



Avon rodund in onn e miez ha la Regiun Surselva cumprau il baghetg dalla Repower el marcau da Glion. La sonda ei il num niev dalla casa vegnius scuvretgs: Casa Surselva. Gionina Spescha e Denis Marmy, ch'ei era stai la sonda ils acturs dil toc teater «Il tun dalla regiun – la Sursilvana ed il Sursilvan», han presentau il num.

FOTOS H. HUONDER



Dapi sis onns presidescha Ernst Sax da Sursaissa la Regiun Surselva. En siu plaid da beinvegni la sonda ha el fatg ina revista sils 50 onns dapi la fundaziun dalla corporaziun da vischnauncas.

«Las sfidas ein restadas las medemas»

La Regiun Surselva ha festivau il giubileum da 50 onns la sonda vargada a Glion

DA HANS HUONDER / ANR

■ Cun in program variont ha la Regiun Surselva festivau la sonda il giubileum da 50 onns. Giuven e vegl ein stai envi dai ed han saviu guder in'interessanta porschida. Il president dalla regiun, Ernst Sax da Sursaissa, ha schau passar revista quels tschun decennis ord vesta dalla Surselva. El ha denton era fatg allusiun dallas sfidas futuras. Il plaid festiv da Sax ha intunau la festività. En quel ha el buca mo saviu beneventar la presidenta dalla regenza, cussegliera guvernativa Barbara Janom Steiner, mobein era ses antecessurs Fridolin Hubert, Dumeni Columberg, Martin Caballar e Sep Cathomas sco era igl anteriur secretari general Theo Maissen ed igl actual Duri Blumenthal. La fiasta a Glion ei stada aschidadir il punct culminont d'ina entira jamna festiva. Lentschatta ei vegnida fatga a Sedrun, silsuenter ein suandadas visetas a Laax, Valendau e Val S. Pieder. Tenor Sax han quellas fiastas giu in messadi: Il tun dalla regiun. Scolaras e scolars dalla partiziun scola media professiunala dil Center da formaziun Surselva han buca mo giu la funcziun da purtar il tun els vitgs, mobein era da tedlar quel leu. «Els han giu l'incarica da tucclar il puls dalla populaziun», puntuescha Sax. Alla fiasta la sonda vargada a Glion ei il num dalla casa dalla Regiun Surselva vegnius presentaus alla publicitad. Ella «Casa Surselva» sco quei ch'ella senumna ussa sesanflan tuts uffecis regiunals e la scola da musica. Als visitaders ei vegniu purschii in program cun in toc teater e bia musica e cant cun scolaras e scolars dalla Scola da musica Surselva e dalla partiziun scola media professiunala dil Center da formaziun Surselva. Tut en tut han 70 affons e giuvenils collaborau e leutier plirs magisters sut l'egida dils incumben-

sai pil program David Flepp ed Annadora Friberg. Igl ei vegniu purschii in gentar cun products – silmeins parzialmeins – dalla regiun.

In sguard anavos

«Nus savein s'imaginar co ei ha tunau pli baul ella regiun cura ch'ins ha entschiet culla collaboraziun regionala. Ni co ha ei tunau cura ch'ins ha entschiet ad extender las incumbensas sur ils cunfins dallas vischnauncas ora e tgei discussiuns ch'ei ha duvrau e cun tgei arguments igl ei reussiu da perschader ils responsabels per la lavur regionala», di Sax ch'ei era deputau e president communal da Sursaissa Mundaun. El constatescha ch'ei deva avon 50 onns in niev slontsch dalla vart dalla confederaziun: «Il cussegl federal ha decidiu da metter la promozion dallas regiuns da muntogna sin ina nova basa. Quei ha menau al svilup da concepts per la promozion dallas regiuns.» Ils 15 d'ost 1967 ei la Pro Surselva vegnida fundada, la cuminonza da lavur per la promozion dalla regiun. Dapi lu ein las funcziuns ed incumbensas dalla cuminonza semidadas e cun ellas era il num. Da Pro Surselva e Corporaziun da vischnauncas Surselva a Regiun Surselva. Ina midada ha ei era dau tier la fuorma giuridica: Ord in'unien ei daventau ina corporaziun dil dretg public e la finfinala ina corporaziun dil dretg cantunal cun atgna personalitad giuridica. En quels 50 onns ei era la struttura interna semidada. Lentschatta cun 49 vischnauncas, ussa aunc cun 17 e naven dil schaner aunc 15. «La promptadad per refuormas ei evidenta en nossa regiun. En connex cun la collaboraziun intercommunal eis ella daventada pli simpla. En in gremi pign sco la conferenza da presidents san decisiuns vegnir pridas pli spert», constatescha Sax.

Differentas midadas

Semidada ei denton buca mo la composiziun dallas autoritads e dall'organisaziun, mobein era il spectrum d'incumbensas. Plirs pensums regiunals ein vegni adossai alla Regiun Surselva: «Per dar il damogn allas incumbensas multifaras ell'administraziun e sil sector dalla formaziun savein nus sefidar oz da buca meins che 121 collaboraturas e collaboratur.» Semidada ei denton era la structura dalla populaziun dalla Surselva. La regiun ha dameins habitonts e leutier ei la relaziun denter giuven e vegl semidada da rudien. «Quei ei dus signals ch'ei gronda sfidas per las vischnauncas e la regiun», di Sax. In seigi denton restau: «Las sfidas pigl avegnir ein aunc oz las medemas. Ei ha num constatar impuls e schanzas ad uras per schia saver tschentiar ils binaris. Il fundament presuenter fuorma la nova politica regionala dalla confederaziun. Quels instrumentaris ein denton mo aschi buns sco quei che nus nezegiein era els.» Era sch'el spectrum d'incumbensas dalla Regiun Surselva seigi daventaus pli e pli gronds seigen las incaricas centralas dil temps da piunier aunc adinas centralas, numnadamein la politica regionala e la dismissa dil rumien ni la formaziun. Sax appellescha denton era alla solidaritad. Sco pli baul seigi quella era oz indispensabla. «Da gronda muntada per nossa regiun ei da vegl enneu la bilinguitad cun romontsch e tudestg sco lungatgs ufficials ellas singulas vischnauncas. Il lungatg ei era ina basa essenziala per la vasta cultura che nus havein en nossa regiun e dalla quala nus stuein haver quitaun communabla sur ils cunfins dallas singulas vischnauncas ora», di Sax. El fa era menziun dalla scartira festiva da 50 onns Regiun Surselva edida en connex cul giubileum da 20 onns da La Quotidiana. Il cudisch «Nossa Patria» sappi vegnir recomandaus ad in e scadin.



Il survetsch logopedic ei ina dallas partiziuns dalla Regiun Surselva che sesanfla ella Casa Surselva.



L'emprema runda dalla discussiun al podi davart l'impurtonza dalla scolaziun ella regiun. Da seniester Romina Dietrich, Paul Monn, Marcus Caduff (tut anteriurs scolars dil Center da formaziun Surselva) e la moderatura Isabella Wieland.



70 affons e giuvenils dalla Scola da musica Surselva ni dalla partiziun dalla scola media professiunala dil Center da formaziun Surselva han cooperau la sonda vid las produziuns musicalas pil giubileum da 50 onns dalla Regiun Surselva.



La sonda ha in e scadin giu la pussevkladad da prender investa dallas localitads ella Casa Surselva.